

壬癸志稿十三

太倉錢寶琛伯瑜輯

同里

葉裕仁涵溪
季錫疇菘耘
趙兆熊耳山
畢庭杰雄伯

參校

人物

太倉州

釋道

元

王惟一栝蒼人自號景陽子父官華亭因家焉棄家從方外遊遇異人授還丹有得乃著道書晚年寓太倉樊涇之嶽祠泰定三年書遺事及偈畢端坐而逝

壬癸志稿

釋道

一

周靜清雙鳳人父景純元忠顯校尉職千戶督海運靜清幼好黃老學事龍虎山張真人為道士通符籙禁呪屢著靈異建普福宮敕授平江路道錄清甯抱一凝妙真人

楊士冠住湖川塘遇人授以道術能投蓮實於冬池頃刻生花葉常啜茶肆中滴椀水成錢以酬直翦紙為鶴能飛舞奇異莫測

明

席應真號子陽子常熟人少辭家事老氏學精經籙丹法頗涉儒籍旁通兵家言奉母甚至葬祭哭泣如初喪

人或問之曰豈有不孝神仙耶始提點雙鳳普福宮遷郡之白鶴觀及相城靈應宮洪武中卒

周元真普福宮道士道行修潔傳莫月鼎五雷之法斬勘之書得之徐無極王侍宸後授王繼華繼華授張善淵善淵授步宗浩宗浩授元真皆能致雷雨而元真尤爲奇特

善定海甯寺僧號止庵太倉吳氏子詢法於萬壽都綱相本空得言外旨後涉獵經史而戒行尊嚴晚年退閒日與學徒講說四書人稱定四書

清奇海甯寺僧永樂六年與修大典十七年復召至京

壬癸志稿

釋道

二

師校讐三藏未畢而逝

惟寅喜談忠孝面折人過永樂六年與修大典住持洞庭西湖諸寺尋至京校讐三藏賜法服數珠還居淮雲寺以終

水噴雀不知何許人游寓雷應堂冬月常浴水人戲呼水噴雀僧卽應因以名一日忽自言當明日午時去至期人聚觀作偈云水噴雀水噴雀四十五年無歸著今朝鼓翅向天飛萬丈藕竿黏不著遂逝

桑宗道號雲野道人好道術農家有怪乞宗道符箓揭之見門外有黑虎蹲踞怪遂息嘗自言曰吾葬以千鶴

爲期及葬來鶴千餘見者驚異

韻
柯雪初爲火者輒於突作樹石狀後畫山水有名家丰

月潭楊氏子出家五臺山受具足戒遊蜀邛犍山中
最久隆慶五年來州王世貞兄弟築室居之萬曆十四年
示寂初得疾水飲五日絕水二日浴畢使人誦無量壽
佛經聽已坐化

三際蜀僧幼喪明暗誦大藏經論記持不忘萬曆乙巳
間來太倉王文肅錫爵王尙書世貞請講法華大要剖
析宗旨因卓錫於潮音庵以老

壬癸志稿

釋道

三

道源號石林許氏子嘗註李義山詩三卷王士禎論詩
云獺祭會驚博奧殫一篇錦瑟解人難千年毛鄭功臣
在猶有彌天釋道安又有石林寄巢詩六卷常熟陸貽
典刻之

智介字端虛海甯寺僧善酒好鬪僑寓蘇州閭門順治
二年六月 大兵至楊文驄拒守智介跳躍自奮與寺
僧訣曰我此行當判一死汝等可生奠我乃飲酒數斗
與其徒慧僧揮刃去尋接戰殺二十餘人奪馬跨之乘
勝追擊後騎益集矢如蝟毛慧逸去智介獨奮勇格鬪
又傷三人中矢死同時隆樹字景賢太倉衛人結廬東

洞庭山性爽直有膂力 大兵駐蘇州眾將攻城隆樹披重甲爲先驅城中精騎突出眾潰散隆樹戰死 國朝

法樹一名德樹以鐵杖隨身雲游者六十六年或云鼎革後隱於僧銷兵鑄杖故相傳爲鐵杖和尚晚駐錫鐘樓勔建獅子林力田種樹以終

僧典字嵩籍桂林人本姓朱鼎革後游江浙間至正覺庵從靈隱具德受戒爲僧謁靈巖繼起傳授心印邑紳士請主萬壽寺旋移錫小祇園後主禪燈法席閉戶焚脩年八十一卒

壬癸志稿

釋道

四

楊嘉斌字猶龍江西貢生屢試不偶縱游名山遇異人楊規源授玄門之學尤神火龍祈禱法知州白登明延禱雩壇不日降霖江浙間甚神其術晚年卜居城南年八十三卒

通雲號石奇徐氏子少孤出家南廣寺徧參諸方得法於天童圓悟後主雪竇席十有七年復歸南廣康熙二年刻期示寂

元璿字睿石太倉陳氏子性孤挺不隨世俗自幼愛讀少陵詩年十三作秋望詩有吳地笳簫哀夜月漢家禮樂委秋風之句雍染後遍參諸家時晦山和尚繼席靈

隱師往依焉晦公退老佛日師爲首座又駐錫嘉善東塔禪寺後退隱茜水寶積禪院有荆山詩集法語行世孫可成字浩軒州人少不茹葷養性吐納居州城隍廟得龍虎山周金榜靈符能除妖魅在帆山顧氏結茅蓬畱數年雍正間爲沙溪延真道院住持

壬癸志稿

釋道

五

壬癸志稿十三終